



19-01-2016

Inatsisartut suleriaasianni § 37 naapertorlugu Naalakkersuisunut imaattunik apeqqutissaqarpunga:

- 1.**  
**Namminersorlutik Oartussat Nalunaarutaanni nr. 19 8. oktober 2015-meersumi kapitali 2 §5-imi tusagassiutinut tapiissuteqartarnermut tapiissutisinissamut piumasaqaatini allassimavoq qinnuteqartussat Kalaallit Nunaanni angerlarsimaffeqartuussasut. "Kalaallit Nunaanni angerlarsimaffeqartuuneq" Naalakkersuisuniit qanoq paasineqarpa?**
- 2.**  
**Naalakkersuisut isumaat naapertorlugu qanoq innikkut suliffeqarfik Kalaallit Nunaanni angerlarsimaffeqartuusarpa, piumasaqaatillu qanoq ittut atuutissappat?**
- 3.**  
**Danskit suliffeqarfiutaasa nunatsinni immikkoortortaqarfii suliffeqarfittut Kalaallit Nunaanni angerlarsimaffeqartutut isigineqarpat?**
- 4.**  
**Tusagassiutinut tapiissutisinnaanermut piumasaqaatit nutaat Naalakkersuisuniit naammagisimaarneqarpat (tusagassiutit tapiissutisinnaanerannut aqqissuussaq nutaaq), imaluunniit siunissami tusagassiutit projektinut tapiissutinik pissarsisinnaanerannut piumasaqaatit allanngortinneqarnialersaarpat imaluunniit erseqqissarneqarnialersaarpat? Aappiuppat: Piumasaqaatit suussappat aamma sooq taakkuussappat?**
- 5.**  
**16. december Naalakkersuisut tusagassiutitigut nalunaarummi allapput ingerlassamut ataatsimut tapiissuteqartoqarsimasoq, tassa "tusagassiutinut tapiissutinut sumulluunniit attuumassuteqanngitsumik internetsikkut nutaarsiassanik aamma ullutsinni oqallisaasunik nutaarsiassiisarnissamut paasissutissiisarnissamullu"<sup>1</sup> ingerlassamut. Tassani qeqqa.gl pineqarpa imaluunniit projekti sulii inerisarneqanngitsoq qeqqa.gl-imiillu pigineqartoq pineqarpa?**
- 6.**  
**Tapiissummut qinnuteqartut arlaliuppatta taamatullu aningaasaliissutissat tamakkiisumik atorneqarpata tamanna Naalakkersuisuniit iluatsinnertut isigineqassava? Aappiuppat, taava Naalakkersuisut siunissami tapiissutip soqutigineqarnerulernissaanut qanoq iliuseqassappat?**

---

<sup>1</sup> [http://naalakkersuisut.gl/da/Naalakkersuisut/Nyheder/2015/12/161215\\_medie](http://naalakkersuisut.gl/da/Naalakkersuisut/Nyheder/2015/12/161215_medie)

(Inatsisartuni ilaasortaq, Peter Olsen)

**Tunngavilersuut:**

Tusagassiutini projektinut tapiissutitut aqqissuussamut nutaamut ataasiinnaq tapiissutisisimasoq saqqummerpoq. Taanna tusagassiunerup iluani kalaallinut ersarissumik sammisuuvoq, taamaattorli piginnittut Danmarkimi najugaqartuullutik. Tamanna pillugu Kalaallit Nunaanni "angerlarsimaffeqartuunissamik" qanoq paasinninnissamut oqallinneq pilerpoq. Oqallinneq tamanna soorunami pingaaruteqartuuvoq nalornisoornissarlu pinngitsoorniarlugu Naalakkersuisut ersarissumik oqaaseqartariaqarlutik.

Projektinut tapiissutitut aqqissuussamut tassunga Inuit Ataqatigiit akkerliussimapput ilumullu pisariaqartuuneranik sunniutissaanullu tunngassutigut qularinnissimallutik. Aqqissuussap pioreersup inerisarneqarnissaa piumanerusimagaluarparput. Tusagassiutittat nukittorsarneqarnissaannut inerisarneqarnissaannullu soqutiginnippugut, taamaattumillu tusagassiutit inerisarneqarnissaannut aningaasat atugassiissutit tamakkerlutik atorneqannginnerat ajuusaarutigaarput. Aqqissuussaq piumaneqanngippat naalakkersuisooqatigiinniit atorunnaarsinneqarnissaa eqqarsaatersorfigineqartariaqarpoq, allatullu eqqarsartoqartariaqarluni. Tamannalu aningaasanut inatsisissap tullissaanut pisinnaavoq.

Ullut suliffiusut qulit iluanni apeqqutima akineqarnissaat kissaatigaara.